

Modesto Ruiz 24 aña encabezando Comision Hubenil

ORANJESTAD - Tabata na 1964 ora cu Comision Carnaval Hubenil a ser formá pa duna e hubentud un oportunidad pa celebrá carnaval na un mihor manera, esta dor di participá cu Reina Hubenil y Prins y Pancho Hubenil.

E tempo ey, Aruba tabatin diferente club hubenil. Na inicio, e clubnan hubenil a cuminsá eligí nan Reina, Prins y Pancho, sin un eleccion na Wilhelmina Stadion entre e candidatanan di e diferente club-, organizacion- of skolnan. Connie Francis Club y The Jolly Teeners a bin ta eligiendo nan propio Reina y Prins & Pancho y pues tabata celebrá carnaval den nan propio club pa nan miembronan.

Stimulá dor di e actividadnan di e clubnan ey, un comision a wordo formá, cu Edisson Croes como presidente, cual tabata encargá exclusivamente cu celebracion di Carnaval Hubenil. Y asina e promé eleccion di Reina Hubenil y Prins & Pancho Hubenil.

Na 1964 e promé eleccion di Reina Hubenil di Carnaval a tuma lugar na Tanki Leendert Youth Center. Un público grandi a atendé e evento y tur hende tabata satisfecho cu e actividad nobo aki pa hubentud. E promé Reina Hubenil di Aruba tabata Yolanda Coutinho, representando Tanki Leendert Youth Center. E Prins y Pancho Hubenil tabata Antonio Erasmus como Prins Tolon y Jossy Tromp como Pancho "Bari-gon". Nan tambe tabata di Tanki Leendert Youth Center. E aña ey diferente club a tuma parti den e eleccion pa e concursonan hubenil.

E siguiente aña, 1965, Nel Croes, a wordo eligí Presidente di Carnaval Hubenil. Jane Laclé, representando Jolly Teeners a wordo eligí Reina Hubenil y Nello Loef-stop a bira Prins Catochi y Percy Jeandor tabata Pancho Choqueque. Nan a representá Thomson Fan Club.

Na 1966 Hubert Naar a bira presidente di e Comision Hubenil di Carnaval.

E aña'ki e eleccion di Prins y Pancho a tuma lugar na Eagle Club y eleccion di Reina Hubenil na Wilhelmina Stadion.

Na 1967 Elias Fingal a bira presidente y a dicidí pa pone e eleccion di e aña ey na Coral Strand Hotel y esey tabata e promé aña cu Juliana School su representante a sali Reina Hubenil den persona di Astrid Leenheer.

Na 1968 e comision a celebrá su promé lustro y e tabata bao presidencia di Severiano Luydens. Un fiesta special a ser organizá pa e ocasion aki y el a tuma lugar na Club Estrella.

Na 1969 e presidencia tabata den man di Ronny Brete.

Na 1970 Modesto Ruiz a wordo eligí presidente di Comision Carnaval Hubenil. Y tabata durante e aña'ki cu e Comision Hubenil a uni cu SAC. Esaki tabata un idea di Ruiz, pasobra tanto SAC como e comision tabata sinti cu ambos organizacion tabata trata di haci carnaval di Aruba algo grandi. Union ta forza, y pesey na 1970 e

Comision Hubenil a bira un sub comision di SAC.

Y for di momento cu e comision a uni su mes na SAC no tabatin eleccion anual pa eligí nan presidente.

E último presidente a bira oficialmente un miembro di SAC, mientras cu e otro 5 miembronan di e Comision Hubenil no ta miembro di e Hunta di Directiva di SAC. □